

28 SEP 1998

Mohamed-Singapura

MEDIA DAN KERAJAAN S'PURA DIMINTA FAHAMI MASALAH MALAYSIA

JOHOR BAHRU, 28 Sept (Bernama) -- Kerajaan Singapura dan media republik itu diminta supaya memahami masalah yang dihadapi oleh Malaysia ketika ini dan tidak mengambil kesempatan untuk terus memburukkan negara ini.

Menteri Penerangan Datuk Mohamed Rahmat berkata jika media dan kerajaan republik itu terus berusaha memburukkan Malaysia, ia bertentangan dengan semangat persahabatan dan kerjasama yang telah lama wujud antara kedua-dua negara.

"Kalau Singapura fikir kesejahteraannya amat bergantung kepada kesejahteraan di rantau ini, maka Singapura harus membantu ke arah itu dan tidak mengambil kesempatan untuk memburukkan lagi keadaan terutama memburukkan Malaysia atas kepentingan tertentu," katanya di sini hari ini.

Mohamed diminta mengulas mengenai laporan meluas yang diberikan oleh media cetak dan elektronik Singapura setiap hari sejak Datuk Seri Anwar Ibrahim dipecat daripada jawatannya dalam kerajaan dan parti.

Perbadanan Televisyen Singapura (TCS) turut menemubual beberapa tokoh di kalangan rakyat Malaysia dalam rancangan-rancangannya mengenai isu itu.

"Daripada laporan yang saya terima, tujuan mereka ialah untuk memburuk-burukkan (Datuk Seri Dr) Mahathir (Mohamad) dan dokong Anwar. Saya harap Anwar akan segera dihadapkan ke mahkamah supaya semua penyokongnya baik dalam atau luar negeri akhirnya tahu siapa Anwar sebenarnya. Mungkin nanti mereka akan malu sendiri," katanya.

Mohamed juga berkata bancian yang dijalankan di Johor oleh Bahagian Penyelidikan Kementerian Penerangan mendapati 70 peratus rakyat Johor menyokong tindakan yang diambil oleh Dr Mahathir.

Baki 30 peratus lagi tidak menyokong, yang rata-rata terdiri daripada golongan remaja yang tidak tahu perlunya sebuah kerajaan yang baik, katanya.

Mohamed berkata bancian serupa itu, yang akan dijalankan di seluruh negara, perlu bagi melaksanakan tindakan susulan serta bentuk gerakan yang harus diambil untuk memberi penerangan kepada orang ramai.

-- BERNAMA

MKO MAI